

In ce maniere che un podestât al â salvât Udin.

Dopo che Vignésie 'e veve piardude la so libertât, sul finì dal 1700, pal Friul 'e corevin sù e jù, mo uadagnant, mo piardint, francês, todèscs e rùs. Púars furlàns! E gambiavin paróns squasi ogni dì!

Il 12 di avrìl dal 1809, Udin 'e tornave sot da l'Austrie; ma Napoleon al marciave vitoriôs su Viene, e i francês, cà di nó, 'e vignivin indenànt sul Taiamènt. Il grues dal esercit da l'Austrie, al cirive di mètisi in salf in Carinzie lant sù pal cianâl dal Fiar.

Il generâl Gavasini intànt, cun pôs todèscs, al ere in ta nestre citât, sigùr di no podéi restá a lunc, e juste par chest, fat clamá il nobil Rambaldo Antonini, rappresentànt dal Municipi, cun ché biele maniere che àn simpri vude i todèscs, a i comandà che par l'indomàn di matine la citât 'e paiàs une gruesse contribuzion di uere; se nò al la varès bandonade tes mans dai siei soldâz.

No restave timp di piardi. Bêz no'nd ere, e dai todèscs, za di umór vonde ledrôs parcè che piardevin tant in tal lor país che in Italie, si podeve spietâsi dome che mal. Cemût tirâsi fur? Il Podestât al si ricuardà di Pier Capponi, e al mandà a clamá il uardefûc Còlovic'. « Te ciamarute su la spècule, domàn di matine un pôc prime des undis, tu às di spalancá i balconz e di dái fûc al to paiòn. Po dopo subite tu ti tacâràs a suná la ciampane dal cis'scèl; ma nissùn nol à di savé nuie, se nò ti pari vie dal momènt.

In tal domàn, prin che il generâl al lès in Municipi, la ciampane de spècule 'e scomenzave a suná. Un fant de Comune, viodint il fum a vigní fur dai balconz de spècule, crodint che al ciapi fûc il cis'cèl, al cor a suná une ciampanute c'a ere sun t'un ciantòn dal Palàz; i rispuidin lis ciampanis dal domo, po tachin chês di dute la citât.